

- केन्द्र सरकार पचपदरा रिफाइनरी परियोजना रो खर्च बधा र 79 हजार 459 करोड़ रुपया करण रो फैसलो कीनो- जयपुर मेट्रो रेल परियोजना रा दूजा फेज ने ई मंजूरी मिली।
- मुख्यमंत्री भजनलाल शर्मा किसानां ने माली तौर ऊं मजबूत बणावण रो राज्य सरकार रो संकल्प दोहरायो।
- भारत, अमरीका अर ईरान बीचे लड़ाई रोकण रो स्वागत कीनो।
- देश मांय काल पोषण पखवाड़ो सरू कर्यो जावेला-बच्चां रा पोषण ऊं जुड़्या न्यारा-न्यारा कार्यक्रम व्हेला।

000

केन्द्र सरकार पचपदरा री राजस्थान रिफाइनरी लिमिटेड परियोजना रा खर्च मांय बधोतरी कर र इण ने 79 हजार 459 करोड़ रुपया करण रो फैसलो कीनो है। प्रधानमंत्री नरेंद्र मोदी री सदरत मांय व्ही कैबिनेट रा माली मामलां री समिति री मीटिंग मांय ओ फैसलो करी ज्यो। सूचना अर प्रसारण मंत्री अश्विनी वैष्णव मीटिंग मांय करी ज्यो फैसलां री जाणकारी खबरनवीसां ने दीनी। वे बतायो के पैली ई परियोजना सारू करीब 43 हजार करोड़ रुपया मंजूर करी ज्यो हा। श्री वैष्णव कह्यो के ई रे अलावा हिन्दुस्तान पेट्रोलियम कॉर्पोरेशन -एचपीसीएल कानी ऊं 8 हजार 962 करोड़ रुपया रा और इक्विटी निवेश ने ई मंजूरी दीरीजी। मीटिंग मांय जयपुर मेट्रो रेल रा दूजा दौर ने ई मंजूरी दीरीजी। मंत्री बतायो के जयपुर रा प्रहलादपुरा ऊं टोडी मोड़ ताई 41 किलोमीटर लम्बा कॉरिडोर मांय 36 टेशन व्हेला। ई परियोजना माथे 13 हजार करोड़ रुपया ऊं बत्तो खर्च आवेला।

000

ओ काम राजस्थान मेट्रो रेल कॉर्पोरेशन लिमिटेड कानी ऊं कर्यो जावेला। फेज-2 कॉरिडोर सीतापुरा औद्योगिक हलका, विश्वकर्मा औद्योगिक हलका, जयपुर हवाई अड्डा, टोंक रोड, सवाईमानसिंह स्टेडियम अर अस्पताल, अम्बाबाड़ी अर विद्याधरनगर सरीखी खास ठौड़ां ने जोड़ेला।

000

प्रधानमंत्री नरेन्द्र मोदी जयपुर मेट्रो रा दूजा फेज री मंजूरी माथे खुशी जताता थकां कह्यो के जयपुर मोटा बदलाव सारू तैयार है अर ई खास जतन ऊं शहर रो विकास और तेज व्हेला।

000

मुख्यमंत्री भजनलाल शर्मा कह्यो है के राज्य सरकार किसानां री आमदनी बधावण सारू बीज मुहैया करावण ऊं साखां बाजार ताई पूगावण री सोच सागे लगातार काम कर रही है। वे आज करौली जिला रा नांगल शेरपुर गांव मांय राख्यी ज्यो किसान सम्मेलन मांय बोल रह्या हा। ई मौके वे प्रदेश री न्यारी-न्यारी कृषि उपज मण्डियां मांय 40 करोड़ 63 लाख रुपया ऊं बत्ता खर्च ऊं विकास रा काम करावण रो ऐलान कीनो। श्री शर्मा कह्यो के इण ऊं किसानां ने सुविधा मिलण सागे वां री आमदनी मांय बधोतरी व्हेला।

000

मुख्यमंत्री नांगल हलका मांय दो गेलां माथे सड़क बणावण अर बालाघाट तहसील मांय सरकारी कॉलेज खोलण रो ई ऐलान कीनो। इण ऊं पैली श्री शर्मा आज बूंदी जिला री इंद्रगढ़ तहसील रा गुहाटा गांव मांय राम जल सेतु लिंक परियोजना रा तैत बणायी जा रही चंबल एक्वाडक्ट रा काम रो जायजो लीनो। ई परियोजना रे ज़रिए राज्य रा ऊगणी हलका रा 17 जिलां मांय पीवण अर पाणत सारू ज़रूरी तादाद मांय पाणी मुहैया करायो

जा सकेला , जिण ऊं प्रदेश री करीब 40 फीसदी आबादी ने फायदो मिलेला। मुख्यमंत्री अहलकारां ने परियोजना रा काम तैय बगत मांय पूरा करावण रा हुकम दीना। ध्यानजोग है के 2 हजार 280 मीटर लम्बो चम्बल एक्वाडक्ट कोटा ज़िला रा पीपलदा, समेल अर बूंदी ज़िला रा गुहाटा गांव बीचे बणायो जा रह्यो है।

000

राज्यपाल हरिभाऊ बागडे आज लोकभवन ऊं अजमेर रा महर्षि दयानंद सरस्वती विश्वविद्यालय री नुवी वेबसाइट जनता ने सूंपी। ई मौके वे ई वेबसाइट रे जरिए विद्यार्थियां अर दूजा लोगां सारू भणार्ई-लिखार्ई ऊं जुड़ी जाणकारियां अर विश्वविद्यालय ऊं जुड़ी सगळी प्रक्रियावां ऑनलाइन तरीका ऊं मुहैया करावण री सराहवणा कीनी। श्री बागडे भणार्ई-लिखार्ई मांय नवाचार रे जरिए विद्यार्थियां ने लगातार बधावो देवण सारू कह्यो।

000

भारत, अमेरिका अर ईरान बीचे लड़ाई रूकबा रो स्वागत कीनो है। विदेश मंत्रालय एक बयान जारी कर र भरोसो जतायो के इण ऊं आतूणी एशिया मांय शांति पाछी आवेला अर होर्मुज जल-डमरू-मध्य ऊं बिना अड़चन जहाज निकळ सकेला। ध्यानजोग है के ईरान रे होर्मुज जल-डमरू-मध्य ओजू खोलण सारू राजी व्ह्यां पाछे अमेरिका रा राष्ट्रपति डॉनल्ड ट्रंप ईरान रे खिलाफ चाल रही फौजी कार्रवाई माथे कुछ शर्ता सागे दो सप्ताह रो विराम लगावण रो ऐलाण कीनो है। ई बीचे भारत रो विदेश मंत्रालय ईरान मांय तेज़ी ऊं बदलता हालात ने ध्यान राखता थकां वठे मौजूद भारत रा लोगां ने भारतीय दूतावास सागे सम्पर्क राखण अर अहलकारां कानी ऊं बतायी ज्या गेलां ऊं बेगो ई ईरान छोड़बा री राय दीनी है।

000

आतूणी एशिया रा ताज़ा हालात बीचे सरकार कह्यो है के देश री खदानां अर बिजली बणावण रा कारखानां मांय कोयला रो ज़रूरी भंडार मौजूद है। कोयला मंत्रालय रा संयुक्त सचिव संजीव कुमार कस्सी नई दिल्ली मांय खबरनवीसां सागे बातचीत करता थकां कह्यो के कोयला रा मोल मांय कोई बधोतरी नी व्ही है। पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा ई खबरनवीसां ने बतायो के देश मांय रसोई गैस, पेट्रोल अर डीज़ल पर्याप्त मात्रा मांय मौजूद है अर इण री सामान्य पूर्ति करी जा रही है। सुजाता शर्मा कह्यो के घरेलू ग्राहकां ने प्राथमिकता दीरीजी है ताकि घरां मांय सौ फीसदी पूर्ति तैय करी जा सके।

000

देश मांय काल पोषण पखवाड़ो सरू कर्यो जावेला। महिला अर बाल विकास मंत्रालय री ओर ऊं राख्या जावण वाळा पोषण पखवाड़ा रो मुद्दो -जीवन के पहले छह वर्ष में मस्तिष्क का अधिकतम विकास राख्यी ज्यो है। पखवाड़ा रे दौरान, राज्यां अर केंद्र रा राज वाळा प्रदेशां मांय आंगनबाड़ी केंद्रां रे जरिए परिवारां, सामुदायिक संस्थावां अर स्थानीय निकायां सारू न्यारा-न्यारा कार्यक्रम राख्या जावेला। ई दौरान पोषण पंचायतां, जागरूकता सत्र, प्रारंभिक प्रोत्साहन गतिविधियां, खेल आधारित शिक्षण पहल अर नान्हा बच्चां मांय स्वस्थ जीवन शैली ने बधावो देवण अर स्क्रीन टाइम कम करण सारू अभियान चलाया जावेला।

000

प्रदेश मांय महात्मा ज्योतिबा फुले अर संविधान निर्माण सभा रा अध्यक्ष डॉक्टर भीमराव अम्बेडकर री जयंती रे मौके 11 ऊं 14 अप्रैल तांई न्यारा-न्यारा कार्यक्रम राख्या जावेला। ई सिलसिला मांय सामाजिक न्याय अर अधिकारिता मंत्री अविनाश गहलोत आज जयपुर मांय अनुसूचित जाति-जनजाति रा बुद्धिमान लोगां अर राज्य स्तर रा सामाजिक संगठनां अर संस्थावां रा नुमाइंदा सागे मीटिंग कीनी। मीटिंग पाछे श्री गहलोत बतायो के 11 अप्रैल ने महात्मा ज्योतिबा फुले री जयंती रे मौके कार्यक्रम री सरूआत व्हेला। 14 अप्रैल ने राज्य

स्तर रो जळसो राख्यो जावेला, जिण मांय मुख्यमंत्री भजनलाल शर्मा रो ई शामिल व्हेवण रो कार्यक्रम है। ई मौके ज़िला अर राज्य स्तर रा अंबेडकर पुरस्कार दिया जावेला अर होशियार विद्यार्थियां ने ईनाम दे र नवाजा जावेला। चार दिन ताई न्यारा-न्यारा जागरूकता कार्यक्रम, छात्रावासां अर आवासीय स्कूलां मांय बाबा साहेब री जिन्दगी रा बारा मांय फिल्मां बतायी जावेला। ई सागे ई 14 अप्रैल ताई "संविधान को जाने" मुद्दां माथे सवाल-जवाब री ऑनलाइन होड राख्यी जावेला।

000

सलूमबर ज़िला रा लसाडिया मांय लारला दिनां कुछ बच्चां री मौत रा वाकया पाछे स्वास्थ्य विभाग लोगां ऊं मांदा व्हेवण री सूरत मांय अस्पताल मांय ईलाज करावण री अरज कीनी है। आज जयसमंद उपखण्ड हलका रा बगुरवा गांव मांय विभाग री टीम एक मांदा बच्चा रो ईलाज करावण सारू वां रा पिरवार वाळा ने समझाया। ब्लॉक मुख्य चिकित्सा अर स्वास्थ्य अधिकारी डॉक्टर मनीष पाठक बतायो के समझाइश पाछे बच्चा ने ईलाज सारू नजदीकी स्वास्थ्य केन्द्र मांय भर्ती करायी ज्यो, जठे वां री हालत सुधर रही है।

000